

MALUA PAPA



Tala mai le Kolisi Faa-Faifeau i Malua / News from Malua Theological College

TALOFA LAVA!

O le a mua pea le faafetai i le Atua Silisili Ese, ma faapaleina le Suafa o Iesu le Ao o le Ekalesia i le Viiga, aua o lele ua tolauapi i Maluapapa le Ekalesia Faapotopotoga Kerisiano Samoa ma Atunuu i Fafo. Ae ou te faatalofa faafeiloai atu i le afifio ma susu mai o le Ekalesia i ona tulaga faalupea. Malo le folau, faafetai le faatoatoa malo le tauatai. Talofa Talofa Lava!

E manatu lava ose faautautaga atamai a Tama o le Ekalesia ua lagomau mai tiasa le faatulaga o lana Fonotele ile vaitau tonu lenei o le auina ifo o le Agaga Paia. Aua o le aso o le Penetekoso o le aso lava na fanau ai le Ekalesia Kerisiano.

E faapei lava ona tuualalo Iesu i ona soo, "... ia le tuua Ierusalem, a ia faatali i le mea na folafolaina e le Tama



Ma'afala Limā FS
Pule o le Kolisi

..." Ua asoa le Fonotele ma o le a sauni foi le Ekalesia e toe seu i fanua sa folau. Ae talitonu se lagona ua mafatotoga faale-agaga le Ekalesia, aua o lea sa fa-

talitali i lona Ierusalem - le Laumua i Maluapapa; ma ua toia ile Agaga o le Atamai i gagana. Lea ua maua le malosoi foi e faaauau ai lana molimau i le lalolagi.

Ao le Lomiga o le Maluapapa mo le Fonotele i lenei tausaga 2018, ua faamau ina ai nai oototoga o gasologa o feau ma faiva ole Kolisi Faafaifeau talu ina amatalia lenei tausaga, faapea foi nisi taualumaga ma matatia o lenei Fonotele.

Ia filemu le talii atu o le Ekalesia, ma ia manuia tele lau faitau.

Ma'afala Limā

Ma'afala Limā
PULE KOLISI MALUA

Aoaoga i le Nu'u Pa'ia, Ierusalem:

Auai atu ai le Sui Pule o le Kolisi

Vaaiga mai le Mauga o Olive agai i le Aai o Ierusalem ma ona pa.



Nofoaga o le Lauga Fa'aamuia a Iesu



Satauro i Korokota



O le Sui Pule o le Kolisi, le Susuga ia Alesana Eteuati (FS), sa auai atu i se aoaoga mo le lua vaiaso, mai i le aso 24 o Ianuari seia oo i le aso 05 o Fepuari, 2018 sa faatautaia i le Galilee International Management Institute (GIMI) i Kibbutz Mizra, i Kalilaia, Israelu. O le aoaoga e taua o "Faafoga o Aoga Mauululuga (Management of Higher Education Institutes-MHEI)".

O se aoaoga taua tele mo le faalauteleina o le silafia i mataupu tau aoaoga mauululuga faa-lunivesite ma Aoga Faafaifeau. E 49 sui auai mai i atunuu e 11 (25 lunivesite ma Aoga Mauululuga) sa iai i lenei aoaoga. O le Sui o Malua ma le Sui o le lunivesite Aoao o Samoa na o le pau ia o Sui mai le Pasefika na auai ai i lenei aoaoga.

Ao lona aoga taua lava mo le Sui o Malua, o le asia ai lea o pine ma maa faamanatu o loo taua i totonu o le Tusi Paia.

faaauau itulau 5

SILASILA I TOTONU

Talofa Lava! - Pule o le Kolisi	1	Ripoti Kolisi & Aoga Aso Sa	8-9
Amatalia Galuega a le Kolisi	2	Maluapapa Pre-School	10
Malua Bible School Graduation	3	Library	11
Faamavaega ma Faifeau Faiaoga ma Faletua	4	Tautai A'e	12
Faau'uga Faifeau Samoa	5	Study Center	13
Malo le Tau, Malo le Fai o le Faiva	6	Vaaiga Eseese	14-15
Motu le Pa Ua Iloa	7	Taga Polo	16

Amatalia Galuega a le Kolisi

O le Aso Lulu 31 Ianuari 2018 i le itula e 12 i le aoauli na toe a'e ai le Kolisi Fa'afaifeau i Malua, mai lana tu'uaga umi mo le Kerisimasi ma le Tausaga Fou. Sa molimauina le fa'atumulua o le laumua a le Ekalesia ina ua toe tapena mai Aoao, Faletua, ma a latou fanau auā le toe amatalia o a'oa'oga mo lenei tausaga. E to'a 29 Aoao ma Faletua e to'a 16 o le tausaga muamua na fa'afeiloai i le Kolisi i lea aso. E lē gata i Aoao ma Faletua o le tausaga muamua, ae sa fa'aopoopo mai fo'i le Faletua fou o le tausaga tolu, fa'apea Faletua e to'a 5 o le tausaga fa'ai'uaso. O lenei foi tausaga e tasi le faia'oga fou ua tofia e le Komiti o Malua i le galuega Fa'afaiaoga i le Aoga Tusi Paia a Malua, susuga lea ia Kara ma lona Faletua o Tuluiga. Sa a'oa'oina i laua i le Kolisi Fa'afaifeau o le Pasefika i Fiji (PTC, 2016-2017) ma sa fa'amanuiaina i le fa'aailoga o le Master of Theology (Distinction).



O lea lava aso i le itula e 7 i le afiafi, sa faia ai le sauniga aloaia a le Kolisi e amata ai ana galuega mo lenei tausaga. Sa ta'itai'ina e le Ta'ita'ifono o le Komiti o Malua le sauniga, le Susuga i le Toeaina ia Tavita Anesone FT. Sa auai fa'atasi nisi o Tamā o le Ekalesia, fa'apea aiga ma uo i le sauniga taua mo le Kolisi. O le Upu lava a le Atua sa fai ma ta'imua ma fa'alototele i latou ua fou mai i le Kolisi, fa'apea ma latou ua toe fa'aauau le a'otauina mo lenei tausaga.

Sa fa'ai'uina lea po i se taumafataga na tapenaina e le Kolisi mo Susuga i Toeaina, le Pule o le Kolisi, Sui Pule, Faiaoga ma Faletua, aemaise o aiga, uo, ma e masani. Sa va'aia lava le fiafia ma le fa'aga'e'etia i lea po ina ua toe fa'atasi le fanau a le Atua sa vao eseese ona o le tu'uaga a le Kolisi, ae ua toe fa'atasi mo le fa'aauauna o galuega i le Kolisi mo le 2018.

Manuia Lau Malaga—Kitiona Maulio



“O a'u nei o le Toetu ma le Ola. O lē faatuatua mai ia te a'u e ui lava ina oti, ae ola lava o ia.” (Ioane 11:25)
“A sousou le vasa o le ola nei, ma ua faiaina i le faavaivai. Mafaufau i mea sa faia e Iesu. E te ofo tele ai ma filemu.” (Fuaiupu 1 Pese 225, Pese ma Viiga)

O le amataga lava o galuega a le Kolisi i lenei tausaga, i le aso lona lua talu ona a'e mai na matagi togaina ai le folauga ina ua afea le laumua i le malaga a le maliu ma le oti. O le afiafi o le Aso Tofi, Aso 01 Fepuari 2018, na valaauina ai e le Atua lana auuina ia Kitiona Maulio, o le Aoao Tausaga Muamua mai le Matagaluega a Kuiniselani, Ausetalia. O se tala talitonu gata ona o le taimi muamua lea i le talafaasolopito o le Kolisi Faafaifeau ua afea ai e le malaga a le maliu ma le oti le Kolisi i le tau amataga o ana galuega o le tausaga. O se taimi faigata mo le Alii Pule ma le Faletua, Aiga Faiaoga ma Faletua ma le Kolisi atoa lenei tala faanoanoa. E ui ina e lei matua umi le mafutaga ma le Aoao ma le aiga, ae ua lagonaina lava le tiga loloto ona o se itu tino ua aveesea.

O le Aoao o Kitiona ma lona faletua ia Taafili ma si o la alo tamaitai e omai i Kuiniselani Ausetalia i le EFKS Pine Rivers. O ni auuina talavou na matua vaaia lo la fiafia ina ua ulufale mai i le Kolisi. O lo la naunautaga, e tutusa uma lava ma le aufaigaluega faaolioli e tau mai le Kolisi, ina ia faaogaina mo le Atua i lana galuega pe a manuia le taumafai. Ae paga lea ua le o gatasi le futia ma le umele i le finagalo o le Atua ma le naunautaga sa iai. Ae o le puleaao ma le finagalo o le Atua i le soifua, o le mua lava e le fuatia ma le ti'a e le seua, e fai toatasi lava.

Polokalame o Toe Sauniga o le Aoao

O le Aso Faraile 09 Fepuari, 2018 na faia ai le sauniga lotu a le Kolisi mo Kitiona ao foufou lona sa mo Brisbane Ausetalia e lagomau ai. O lenei sauniga lotu na taitaiina e le laulau o le Komiti o Malua. Na faia i le Malumalu O Le Fale Iupeli i le itula e 6 i le afiafi. O le taitai o le sauniga o le Susuga ia Tavita Anesone (FT) o le taitaifono o le Komiti o Malua. O tatalo na saunia e Iosefa Uilelea (FT) o le Failautusi o le Komiti o Malua. O le lauga na saunia e le Taitaifono o le Fonotele, Tunumoso Iosia (FT), o le sui foi o le Komiti o Malua. O le Pule o le Kolisi, Maafala Limā na faitauna le Tusi Paia ma faia le molimau a le Kolisi. O Dr. Taipisia Leilua (Faiaoga Malua) na faaulufaleina le sa o le Aoao i le malumalu. O le molimau mulimuli na saunia e le Faletua o Kitiona ia Taafili Maulio.

O le upu faamafanafana a le Taitaifono o le Fonotele, Tunumoso Iosia, Ia aua le faanoanoa pe lotu vaivai, ae faatuatua i le Alii o Iesu e maua ai le faamafanafanaga. E oo a i le oti e iai le Atua. O le aotelega lava o molimau mo Kitiona, o le faafetai, alofa, misia ma le lotu faanoanoa, ona o le naunautaga e avea ma faifeau ua motusia faafuasei ona o le finagalo o le Atua ua faitoatasi lava. Na faaiuina le mafutaga i lea po i le taumafataga i le Fale Senetenari ma na saunia foi faaaloaloga e aiga na lua mo Toeaina sa iai i lea po, faapea le Pule ma le Kolisi.

O le Aso Sa 11 Fepuari 2018 na tuuvaa atu ai loa le sa o le Aoao ma le aumalaga na o e molimoli o ia i Brisbane. O le Susuga ia Tavita Anesone (FT) ma Iosefa Uilelea (FT) sa fai ma sui o le Komiti o Malua i le aumalaga. O le Pule o le Kolisi, Maafala Lima, Rita Eteuati (Faletua o le Sui Pule), Dr. Arthur Wulf ma Dr. Vaitusi Nofaiga (Faiaoga Malua) o sui ia o le aumalaga a le Kolisi o Malua. Na molimoli ai foi ma le fesoasoani a le Kolisi mo le falelauasiga o le Susuga i le Aoao ina ua taunuu manuia le malaga i Ausetalia.

O Toe Sauniga o le Aoao ia Kitiona na faia i le Aso Toonai 17 Mati 2018. Na taitaiina lava e le laulau a le Komiti o Malua faapea ai ma Tama o le Matagaluega Kuiniselani. Na matagofie mea uma o toe sauniga o le alii Aoao, ma ua mapu atu ai lana auuina a aao o lona matai ua valaau mai. E ui ina faigata le mea ua tupu mai ae o taimi lava faape nei e moni ai upu o le pese a le EFKS, *“Mafaufau i mea sa faia e Iesu. E te ofo tele ai ma filemu.”* Ae ua fetalai lo tatou Alii Faaola, *“O a'u nei o le Toetu ma le Ola. O lē faatuatua mai ia te a'u e ui lava ina oti, ae ola lava o ia.”*



Malua Bible School Graduation Savaii



Ulua'i Faauga a le Aoga Tusi Paia a Malua i Savai'i 2018

O le aso 17 o Mati 2018, sa faia ai le uluai faauuga a le Aoga Tusi Paia a Malua i le motu tele i Salafai. O se aso taua tele lea aso i le talafaasolopito o le Aoga Tusi Paia a Malua talu ona faatu o lona lala i Salelologa i le 2016. O le faamoemoe sa faupo fauao ao lea ua tini lau, ua tali foi tatalo a Tama na latou faamaite i lenei aoga. Sa faatumulia lea aso i Mataniu Feagaimaleata i le falesa o le EFKS i Sapapalii ia i latou sa molimauina lenei uluai faauuga i Salafai.

O le aofa'i o le au faauu e toa 28 e aofia ai Aoa Fesoasoani, Tiakono, Faiaoga Aso Sa, seia oo lava i tupulaga talavou. Sa faau'uina ai foi tamaitai e toa 4; o faletua o Aoa Fesoasoani, Tiakono ma le tamaitai Faiaoga Aso Sa.

O se aso matagofie aua ua faamanuina uluai alii ma tamaitai aoga o Savaii, o e sa aoaoina i mataupu tau le Tusi Paia faapea Mataupu Silisili. Ua sa'o ai foi le mau a le malo, o le mea e lelei mo Upolu ua lelei foi lea mo Salafai.

Sa faatumulia lea aso i Tama o le Ekalesia ma o latou Faletua, Susuga i Faafegaiga ma o latou Faletua, ae faapea aiga ma uo a le Au Faauu 2018. O le susuga i le Taitaifono o le Komiti o le Au Toeaina ia Tavita Anesone sa ia taitaia le sauniga. O le faitauna o le Tusi Paia o le Toeaina o le Matagaluega Faasaleleaga ia Leaso Tupai. O tatalo sa saunia e le Susuga i le Failautusi o le Komiti o Malua ia Iosefa Uilelea, a'o le Ripoti Faaletausaga o le Aoga Tusi Paia sa saunua iai le Susuga i le Alii Pule ia Maafala Lima.

I le ripoti a le Alii Pule sa ia toe faatepa ai le aofia i le amataga o lenei aoga i le tolu tausaga talu ai ao avea le Susuga ia Siu Vaifale ma Sooupu o le Aoga Tusi Paia. O le Aso 11 Febuari 2016 i le Tofiga a le Matagaluega Faasaleleaga sa faia ai le folasaga a Vaifale e faailoa aloaia ai faafuaga mo le amataina o le Aoga i Savaii ma sa faapea ona amata ai loa ona lesitala o uluai alii ma tamaitai o le Aoga i e sa iai i lea tofiga.

Ao le Aso 19 Febuari na faapea ona amata aloaia ai loa le aoga i le Aoga Matata Eseea a le EFKS i Salelologa i se sauniga lotu sa faia e le Sooupu ia Vaifale i le afiafi. O i latou na lesitala ma auai ai i lea aso e toa 55; 7 tamaitai ae 48 Alii. O i latou nei o uluai alii ma tamaitai aoga o le Aoga Tusi Paia a Malua i lona lala i Savaii. Sa faailoa e le Alii Pule lona maofa i le alofa ma le agalelei o le Atua, pe a toe mafaufau i le amataga mai o lenei aoga. Aua o lea ua o'o mai i le 2018 ua faamanuina le toa 28 o i latou na amataina lenei aoga. Ma o uluai fua ia o taumafaiga a la tatou Aoga i Salafai.

O le agaga lea o le faafetai i le Atua sa matilatila i saunoaga o lea aso, e le gata i le upu faamafanafana ma le faamalosiua a le Taitai o le Sauniga, Susuga i le Toeaina ia Tavita Anesone ae faapea foi le Faletua ia Taiaopo Taiese Soana'i Papali'i sa avea ma sui o le Au Faauu e momoli la latou faafetai i Tama, ae faapea Ekalesia, aiga ma uo. O lea agaga sa momoli mai foi i siufofoga malie o le aufaipese a tupulaga talavou a Sapapalii sa o latou lagiina viiga sa matua maua ai le matagofie o lea aso.

Lisi o le Au Faauu 2018

Tusi Pasi [IV] i Aoaoga Faale-Mataupu Silisili - Certificate IV in Theological Studies

1. Ana Antonio - Faletua o le Aoa Fesoasoani, EFKS Iva
2. Ariu Toleafoa Talitimu - Aoa Fesoasoani, EFKS Luua Faga
3. Fa'imanu Toesea Antonio - Aoa Fesoasoani, EFKS Fogatuli
4. Faatoatoa Latu Niupulusu Emelio - Aoa Fesoasoani, EFKS Vaitoomuli
5. Faigafou Amataga - Tagata Ekalesia, EFKS Fusi
6. Fiu Tagaloa Sapa - Aoa Fesoasoani, EFKS Iva
7. Gaugu Tagaloa Lio Failava - Tiakono, EFKS Sapapalii
8. Itaimatagofieaievaga Rimoni - Faiaoga Aso Sa, EFKS Saasaai
9. Kupito Faaolatane Faaono - Aoa Fesoasoani, EFKS Sili
10. Letoa Tava'u Tuimauga - Aoa Fesoasoani, EFKS Fagafau
11. Letufuga Iupeli Ketu - Aoa Fesoasoani, EFKS Puleia
12. Lualua Namulauulu Tautu - Aoa Fesoasoani, EFKS Asaga
13. Lumaupolu Ropati Eteuati - Aoa Fesoasoani, EFKS Saasaai
14. Mafuvao Puni Leasi - Aoa Fesoasoani, EFKS Saipipi
15. Magele Liligi Faanunu - Tagata Ekalesia, EFKS Saasaai



Na maca o le sauniga ona faia lea o le aiga faapea faaaloaloga sa saunia e le Matagaluega malosia a Faasaleleaga. Sa faatumulia lea aso i le tamaoaga sa aao iai le paia o le Matagaluega i le Susuga i le Toeaina ia Leaso Tupai, faafegaiga o le Matagaluega ae faapea Ekalesia taitasi. O lagona o le Agaga faafetai, aua o le Matagaluega lava a Faasaleleaga sa faamaite i le faatuina o lenei lala o le Aoga Tusi Paia a Malua i Salafai, ma o lea ua tau la latou miti; ua faauuina nisi o tama, tina, alii ma tamaitai o le Matagaluega i le uluai faauuga i Salafai.

E avea ai lenei avanoa, e momoli atu ai le agaga faafetai tele a le Alii Pule ma le Aiga Faiaoga i le Susuga i le Toeaina ia Leaso faapea le vasega o Faafegaiga ma Ekalesia taitasi o le Matagaluega Faasaleleaga ona o la latou lagolago malosia i le faatinoga o lenei aoga. E le gata i le talileleia o Susuga i Faiaoga i aso uma e tuuvaa atu ai mo le faia o aoga, a'o faaaloaloga maua ai foi sa taua ai i lea aso. Faamanuia le Atua i lo outou soifua ma le punouai ai i le galuega a le Atua. Tatalo foi ina ia manuia Ekalesia taitasi uma i le alofa ma le agalelei o lo tatou Tapaau i le lagi. Faatutumu mea ua faagaogaina ma ia saga liligi atu le tamaoaga o le Atua.

O se Ripoti lea a le Aoga Tusi Paia a Malua mo lenei Tausaga. Manu tele ia le alo atu o le Ekalesia i ana fonotaga o lenei tausaga 2018.

Soifua ma ia Manuia.

Sooupu.



16. Mailata Hemi Siaso - Tiakono, EFKS Vaitoomuli
17. Moana Taua Sefo - Faletua o le Tiakono, EFKS Asaga
18. Niui'a Faagu Ulimasao - Aoa Fesoasoani, EFKS Saipipi
19. Poufa Poufa - Aoa Fesoasoani, EFKS Vailoa Palauli
20. Sa'ausi Semisi Matautia - Faiaoga Aoga Faifeau, EFKS Iva
21. Sefo Tafili Sefo - Tiakono, EFKS Asaga
22. Seve Talalafai Luki Faifua - Tiakono, EFKS Iva
23. Taiāopo Taiese Soana'i Papali'i - Faletua o le Aoa Fesoasoani, EFKS Lalomalava
24. Tuamasaga Salu Mika - Aoa Fesoasoani, EFKS Tafua - Tai
25. Tuailii Tagataesolomona Akeripa Toeso - Aoa Fesoasoani, EFKS Fusi
26. Tuilagi Vaivai Tuiliili - Aoa Fesoasoani, EFKS Fatausi
27. Tunu Gose - Tiakono, EFKS Maota
28. Unasa Paeu Talatonu Vaafusuaga - Aoa Fesoasoani, EFKS Siufaga i Faga

Faamavaega Dr. Faalepo & Lemapu Tuisuga

E moni ai le upu ua masani ai le atunuu, e faigofie ona faatalo-fa ae faigata ona faamavae. O lagona ia na faalogoina e le Alii Pule ma le Faletua faapea le Kolisi i le po na faamavae atu ai i se tasi o faiaoga sinia o le Kolisi, le susuga ia Dr Faalepo Tuisuga ma le Faletua ia Lemapu ma le fanau. Aua o nisi ua leva tausaga o mafuta ai e ala i le galuega faafaiaoga. O Faalepo ma Lemapu ua la taliaina le valaau mai a le EFKS Taeao o le Talalelei, Sini Niusauelese Ausetalia e fai ma a latou faifeau. Ua talia foi e le Komiti o Malua le faamatuu atu o nei auauna faatasi ai ma faamanuiaga mo le isi laasaga o lo la soifua galulue. O le ala lea ua faamavae atu ai le Kolisi mo lenei aiga. O Dr Faalepo sa faauluulu iai le Matagaluega o le Faiva Alofilima o le Mataupu Silisili (Practical Theology) faapea le Au Asafo a le Kolisi. Sa ia tauaveina foi le tofiga o le Sooupu o Tusiga a le Kolisi (Theses Coordinator). Ua silia ma le 20 tausaga le mafutaga a lenei auauna ma le Kolisi. Na ulufale mai i laua i le tausaga 1995 ae sa amatalia le auaunaga faafaiaoga i le tausaga e 2001.

O le Aso Tofi 24 Febuari, 2018 na faia ai le aiga faaleaiga a le Kolisi e masani ai e faamavae atu ai mo lenei aiga. O le Susuga i le Sui Pule ia Alesana Eteuati na fai ma fofoga o le Kolisi e faaleo le faafetai i nei auauna i lo la sao taua ao galulue ai i Malua nei. E le gata i le Faiaoga ae faapea ai foi ia Lemapu i ona sao taua i le tapenaina o Faletua o Aoa mo le galuega o loo faatalitali mai. O le Faletua o le Sui Pule ia Rita Eteuati na molimoliina le faafetai ma le meaalofo a le Mafutaga a Tina mo Lemapu. Na faapea foi ona faaalua le agaga faafetai o le Aoga Aso Sa e ala ia latou pesepesega ma le meaalofo mo Lemapu ona o nei tausaga e tele sa ia galue ai faafaiaoga Aso Sa. Na fai foi le Susuga i le Aoa Faaiuso ia Leuelu Setu ma sui o le Au Asafo e tauaoina la latou foi meaalofo ia Faalepo mo lana taitaiga o lea foi vaega taua o le Kolisi. Na sosoo ai loa ma fiafia a le Kolisi ina sei toe silasila ai Faalepo ma Lemapu ae

lei tuua lenei aai. Na taualugaina fiafia i lea po e le sausaunoaga a le Susuga i le Faiaoga Fomai ma le Faletua ae aiauli i ai le Aiga Faiaoga ma le Kolisi.

O le aotelega lava o lagona o le po o le faafetai ma le faamalo, le

alofa ma le misia. Sa saunoa foi Faalepo e faaalua le agaga faafetai ona o le avanoa sa auauna ai i le Kolisi. Aemaise o le mafutaga ma mea aoga o le a alu ma ia e faatino ai le galuega na maua mai ao iai i le Kolisi. Na iai foi nai motugaafa na ia faasoa mai e fesoasoani mo le galuega faafaiaoga i le agai i luma. Na maua foi le avanoa e saunoa ai le Faletua ia Lemapu e faafetaia ai foi le Kolisi aemaise le Faletua o le Alii Pule ia Lalokava Lima ma le mafutaga a Tina i Malua, Faletua o Faiaoga ma Aoa, mo le alofa ma le mafutaga matagofie sa faia ao galulue ai i lenei aai. Na faaiuina lenei po i le saunoaga faaiua a le Alii Pule ia Maafala Lima e toe faafetaia ai lava le sao taua o nei auauna i le Kolisi. Na ia faaopopo ai foi ma faamanuiaga mo i laua i le galuega o loo sauni atu ai nei. Ona maea ai lea o le po i le vaivevela ma nai mulumulgaveve faaiua o le mafutaga.



Faamavaega—Panama & Herema Pouono



ti o Malua ma faamanuiaga mo lea faamoemoe fou ua valaauina ai.

O Panama sa tautua ai i le Matagaluega o le Talafaasolopito o le Ekalesia Kerisiano. O le Faletua ia Herema, e ese mai ai i le tele o ona tiute i le Mafutaga a Tina i Malua, sa ia faiaoga foi i vasega a Faletua Malua, i le Matagaluega o le Feagaiga Tuai.

O le Aso Tofi, 03 Me, 2018 sa faamavae aloaia atu ai loa le Susuga i le Alii Pule ia Maafala Lima ma le Faletua ia Lalokava, Le aiga Faiaoga ma Faletua, faapea le Kolisi atoa e ala i lana aiga faaleaiga e masani ai i lana auauna ma le faletua faapea le fanau.

Sa tauaoina ai foi ni meaalofo mo le faiaoga ma le aiga mai le Mafutaga a Tina Malua, le Kolisi atoa i le Alii Pule ma le Faletua, Faiaoga ma Faletua, ma Vasega Taitasi i Aoa ma Faletua, faapea ai foi le Vaega Faamalositi Tino sa avea ai le Faletua ia Herema ma o latou sui. O le Faletua o le Sui Pule, Rita Eteuati sa faaleoina le faafetai ma molimoliina le meaalofo a le Mafutaga a Tina. O le Faiaoga ia Makesi Neemia sa fai ma sui o le Kolisi e molimolia le meaalofo a le Kolisi, ae o le Aoa Faaiuso ia Elekana Lealiifano sa faia le faafetai ma momoli le meaalofo a le Komiti Faamalositi i lea po.

Sa matagofie lea po i le tele o taumafa eseese ma le felanulanu-

ai o le aiga faamavae sa saunia e le Kolisi atoa. Na faaiuina lea po i fiafia masani a le Kolisi. Na saunia e vasega taitasi a latou fiafia ma e malie eseese foi faatinoga o lea po. Na maua foi le avanoa o le Malua Study Centre i alo ma fanau na faafiafia ai e faaleoina ai lo latou agaga faafetai ia Panama ma Herema i lo la sao i le Study Centre. Na faaiuina le po fiafia i le faatafiti sa saasaa ai le faiaoga ia Samasoni Alama ma le Faletua ia Malavai, ua toe taliu mai ina ua faaiuina le taumafai i le faailoga o le PhD ma ua toe faaauai ai nei le auaunaga faafaiaoga i Malua. O le taualuga sa faatinoina e le Faifeau ia Panama ma le Faletua ia Herema i le la siva samoa ae aiauli iai Faiaoga ma Faletua ma le Kolisi.

Sa saunoa le Susuga i le Faifeau ia Panama e fai ma sui o lo la latou aiga e faafetaia ai le Susuga i le Alii Pule ma le Faletua ma le Kolisi ona o le amanaiaina o si o latou aiga ao galulue ai i Malua. Sa faafetaia ai foi faatinoga o lea po i taumafa eseese ma le po fiafia aemaise o meaalofo ua tuuina atu mo laua ma le fanau. Sa tauaoina ai foi le meaalofo a le Faifeau ia Pouono ma le aiga mo le Study Centre a Malua, o le projector mo a latou foi faatauga.

Sa faaiuina lenei po i le saunoaga a le Alii Pule ma toe faafetaia ai le Susuga ia Panama ma le Faletua ia Herema mo o la sao taua i le galuega i Malua. Faatasi ai ma faamanuiaga mo le sauni atu i le galuega o loo ua valaauina ai nei. Ona faaiuina ai lea i le tatalo ona po ai lea o lea po.

O upu o le pese a le fanau, "O ia oulua ma le manuia, ae tapuai Malua ma le fiafia."

Faau'uga Faifeau Samoa



Faafai ma faasili pea le agaga faafetai ma le agaga vivii i le Atua Soifua. Ina ua faataunuina ma le manuia se tasi o faamoemoe taua o le Fono Tele 2018, o le sauniga lea o le faauuina o faifeau faapoopo mo le Ekalesia. O lea faamoemoe na faataunuina i le Aso Toonai, aso 19 o Me, 2018.

O le sauniga o le faauuga sa taitai e le Faifeau Toeaina ia Lucky R. Slade. O le Susuga i le Faifeau Toeaina ia Iosefa Uilelea (FT) sa feagai ma faamatalaga o le 'Au Faauu. Sa faitauina e le Faifeau Toeaina ia Siolo Tauati (FT) le Tusi Paia, ae sa faaleoina e le Faifeau Toeaina ia Lauie Lupematasila (FT) talosaga mo le sauniga lotu. O Tamā o le Ekalesia sa faaee aao mo le faauuina o Faifeau Samoa, o Lucky R. Slade (FT), Tunumoso S. Iosia (FT), Tavita Anesone (FT), Liki Tiatia (FT), Tauaaga Mataafa (FT) ma Leaso Tupai (FT).

E toaluasefulu ma le fa (24) le aofai o le 'Au Faauu i lea aso. Mai le aofai o i latou na faauuina, e toatolu (3) sui o le Kolisi Faafaifeau i Malua sa faapea ona faauuina i lea aso fiafia.



Karanita & Elena Petaia

O le Susuga i le Faifeau Faiaoga ia Karanita (FS) ma Elena Petaia, sa faauuina i le *Bachelor in Divinity (BD)* mai le Kolisi Faafaifeau i Malua (MTC) i le tausaga 2013. Sa faauuina ma faamanuiaina foi i le faailoga o le *Masters in Theology with Distinction* mai le *Pacific Theological College (PTC)* i le tausaga 2015. I le taimi nei o loo galuega le Faifeau Faiaoga i totonu o le Matagaluega o le Feagaiga Fou, faapea

ma le Faletua ia Elena i le Kolisi i Leulumoea talu mai le 2016.

O le Susuga i le Faifeau Faiaoga Fomai ia Seumaninoa (FS)



Seumaninoa & Neda Puaina

ma Neda Puaina, sa faaiuina ma faauuina le taumafai i le faailoga o le *BD (MTC)* mai le Kolisi i Malua i le tausaga 2012. Sa faauuina le taumafai i le faailoga o le *Doctor of Philosophy (PhD)* i Aoaoga tau i le Tusi Paia (Biblical Studies), mai le *Graduate Theological Union (GTA)* i Berkley 2016. O loo galue nei Seumaninoa i totonu o le Matagaluega o le Feagaiga Fou a le Kolisi Faafaifeau i Malua. O le Faletua ia Neda, o loo galue ma lagolagosua i le tele o vaega taitasi a Faletua i

totonu o le Kolisi.

O le Susuga i le Faifeau Faiaoga ia Apela (FS) ma le Faletua ia Foketi Ah Him, na faauu ma faaiuina le taumafai i le faailoga o le *BD (MTC)* mai le Kolisi i Malua i le tausaga 2013. Sa faauuina i le faailoga o le *Masters in Theology with Distinction* mai *PTC* i le tausaga 2015. O loo faauuina le tautua ma le auaunaga i le Ekalesia e ala i le galuega faafaiaoga o le Aoga Tusi Paia (Malua Bible School), i lalo lava o le Matagaluega o le Feagaiga Fou.



Apela & Foketi Ah Him

O lea e momoli tele atu ai moomooga alofa o le Maluapapa i Susuga i Faifeau ma o latou Faletua. Malo le taupati ma le onosai aua o lea ua tau lau o le faamoemoe, e ala i le avea ma faifeau o le Upu ma le Sakarameta a le EFKS.

Aoaoga i le Nu'u Pa'ia, Ierusalema: Auai atu ai le Sui Pule o le Kolisi.

E le gata i le Feagaiga Tuai ae faapea ai foi ma le Feagaiga Fou. O nisi o nei mataaga e aofia ai le Sami Mate, Mauga o Kilepoa, Tovine o Napota, Toafa o Iutaia, Qumran, Nasareta ma le Vai o Kalilaia, Vai o Ioritana, Kana ma Kapanauami, Malumalu o Maria, Mauga na fagina ai le Motu o Tagata, Ierusalema, Mauga o Olive i le nofoaga na afutoto ai le Alii o Iesu i lana tatalo ina ua latalata ona puapuaga. O le 'Wailing Wall' fai mai o toega o le Malumalu o loo totoe pea lea sa fausia e le Tupu o Solomona. Ia ma isi lava maafaamanatu taua mo le faatuatuaga Kerisiano o loo iai.

Ao nai itu taua na maua mai ai i lenei aoaoga: Asiasi ai i nofoaga e pei ona taua i luga; Fatufatuga o polokalame aoga mo Kolisi ma Iunivesite; Mafaufauga i nisi o auala e faatupe ai polokalame; fetufaaiga o mafaufauga ma Iunivesite tetele ma aoga maua luga; na o ni mafaufauga o le au atamamai o Isaraelu i le faafoega o Aoga ma le fesoootaiga o tagata lautele.

Molimau foi le Sui Pule, o se vaaga ma se faalogona e uiga ese mo ia lava, ona o lea ua tuvae ma vaavaai tonu i nei nofoaga ma maa faamanatu ua loa ona ia aoaoina ma faitau iai. O eleele sa fe-afioa'i ai le Faaola ao lea ua ia solisoli muli aao ai foi. O lana molimau, o se mea lelei tele foi pe a maua le avanoa o le Aufaigaluega i Malua nei e molimauina ai lava e latou ia nei mataaga uiga ese. Mo le Aufaigaluega i Malua nei, talosia ia e vave mai se taimi e tino ai lenei faasoa matua lelei tele.



O la'au olive o lo'o ola pea talu mai le vaitau o lo tatou Faaola o Iesu Keriso

MALO LE TAU, MALO LE FAI O LE FAIVA!



O le Aso Lulu 09 Me 2018, o se aso e fa'agalogatā e le Susuga i le Faifeau Faiaoga Foma'i ia Imoa ma le Faletua ia Amelia Setefano, fa'apea si a la fanau, aemaise o aiga. Auā o le aso lea sa fa'au'uina ai le faiaoga Malua i le fa'aailoga taualoa o le *Doctor of Philosophy (PhD)*, Foma'i o le Tōfā Mamao. O le vi'iga o le Atua ua maua luga lea, ona ua a'e manuia le fa'atamasoali'iga e pei ona sa tapuaia e le Ekalesia, le Kolisi, fa'apea o la aiga.

O le ulutala o lea su'esu'ega e fa'apea: "O le Suli Va'aia o le Atua (A Visible Heir of God)— A Trinitarian theology for the Faifeau identity of the Congregational Christian Church Samoa in Aotearoa New Zealand". O le Iunivesite o Aukilani i Niu Sila sa a'oa'oina ai le Faiaoga. O le Matagaluega o le Mataupu Silisili o lo'o galue ai le Faiaoga i le Kolisi. Saga'i ane ai o le tai, auā le fa'aauuina o le galuega fa'afaiaoga i le Kolisi, mo le Atua ma le Talalelei ia Keriso. Malo le tau, malo le finau! Viia le Atua!



Faalauiiloa le Tusi "A SAMOAN READING OF DISCIPLESHIP IN MATTHEW" a le Susuga i le Faifeau Faiaoga Dr. Vaitusi Nofoaiga



E tusa ai ma le polokalame a le Fonotele i le taeao o le Aso Lua 22 Me, 2018 na faapitoa lava sei faalauiiloa ai le Tusi a le Susuga i le Faifeau Faiaoga ia Dr. Vaitusi Nofoaiga. O se taumafaiga ua maua luga ua ausia e le susuga i le faiaoga ona e le toatele nisi o le aufaigaluega ua mafai ona faatinoina lenei ituaiga galuega. O Dr. Nofoaiga o le faiaoga o le Kolisi Faafaifeau i Malua i le Matagaluega o le Feagaiga Fou. O ia foi o loo faauluulu iai le Matagaluega lenei o le Feagaiga Fou. Ma o ia foi o le Sooupu o Tusiga a le Kolisi (Theses Coordinator). O le ulutala o lenei Tusi ua taua, "A Samoan Reading of Discipleship in Matthew" O lenei tusi e faavae i le tele o suesuega a Dr. Nofoaiga sa faia mo lona faaailoga o le PhD mai le Iunivesite o Aukilani. Ua iai lava nai suiga ua faia iai ina ia faafaigofie mo le aufaitau ina ia le gata mo e o faaauau i le faalauteleina o le silafia i le Tusi Paia, ae ia faafaigofie ona malamalama ai le toatele o le Aufaigaluega galulue i Faifeau ma Faletua, Aoao Fesoasoani ma le lautele o tagata o le Ekalesia.

O lenei Tusi o loo faatauaina ai le avea ma soo aemaise lona faauigaina o tusitusiga a Mataio e uiga lava i le mataupu lenei o le avea ma soo o Iesu. O loo faatauaina ai foi le faauigaina mai le vaai faaSamoa e faitauina ma malamalama atili i tusitusiga a le Tusi Paia.

O lenei tusi o loo lolomiina e le Society of Biblical Literature (SBL) o se tasi o faalapotopotoga tele ma iloga i le lalolagi

aemaise lava i suesuega i mataupu tau i le Tusi Paia.

Na avea foi le avanoa e faafetaia ai e le Susuga i le Faiaoga le avanoa na tuuina atu e le Ekalesia e ala i le Komiti o Malua, Le pule o Malua talu ai o Professor Otele Perelini, faapea le fesoasoani ma le faamalosiā a le Susuga i le Alii Pule o iai nei ia Maafala Limā ua maua ai le atamai faalauteleina ma tino mai ai ana suesuega i lenei tusi. Na afea foi i le faafetai le tapuaiga a le Ekalesia aoao, Matagaluega ma Pulega i Niu Sila sa ia galue ai ao lei ulufale i Malua, faapea ma le fesoasoani ao aotauina ai i le Iunivesite o Aukilani. Ae maise aiga ma si ona faletua ma le fanau.

Sa saunoa le Susuga i le Taitaifono o le Ekalesia, Tunumoso Iosia (FT) e faafetaia lenei taumafaiga. Na faapea ona faaleoina faamanuiaga mo le Susuga i le Faiaoga ma le feagai ai ma tiute i le Kolisi i Malua.

O le tau o le Tusi e \$40 Tala Amerika, ae mo lenei faamoemoe faapitoa, ua faatauina atu ai i le \$40 Tala Samoa. O se pine faamau lelei foi lenei o le Fonotele 2018 pe a maua sau kopi o lenei suesuega taua e te alu ma oe.



Tusi mo le Suega Ulufale 2018

Feagaiga Tuai: ESOTO

Feagaiga Fou: EPERU

Faiaoga Toe Taliu Mai



Rev. Samasoni & Malavai Alama

O le masina o Mati i le tausaga nei na toe taliu mai ai le susuga o le faifeau faiaoga Samasoni ma Malavai Alama, e toe fa'aauau o la tofiga fa'afaiaoga i le kolisi. Ua mae'a nei le galuega sa faia agai le fa'aailoga o le PhD, ma o lo'o talia nei se i'uga o le fa'amoemoe. O le Matagaluega o le Feagaiga Tuai o lo'o galue ai le faiaoga.



Kara & Tuluiga Ipinui

O le sauniga aloaia na amata ai galuega a le Kolisi mo lenei tausaga, sa talia ai le susuga ia Kara ma le faletua ia Tuluiga e avea ma faiaoga. O le finagalo lea o le Komiti o Malua fa'apea le Pule ma faiaoga o le Kolisi, ina ua manuia le taumafaiga i le fa'aailoga o le Master of Theology (*Distinction*) i le Kolisi Fa'afaifeau o le Pasefika i Fiti (PTC). O lo'o galulue nei laua fa'afaiaoga i le Aoga Tusi Paia a le Ekaleisa (*Malua Bible School*) i le Matagaluega o Faiva Alofilima o le Mataupu Silisili (Practical Theology).

Motu le Pa Ua Iloa

Usufono Malua Fonotele

O le Susuga i le Faiaoga ia Dr Tavita Maliko o le Sui Usufono lea a le Kolisi Faafaifeau i Malua o lenei Fono Tele 2018. O le Faiaoga o le Mataupu Silisili ma o ia foi sa saunia le pepa a le Kolisi mo lenei Fono Tele i le aso amata o fonotaga. O le ulutala o lenei pepa ua taua "O LE AGAGA O LE ATAMAI I GAGANA (THE SPIRIT OF WISDOM IN LANGUAGES)". O loo mulimulita'i lava i le manatu autu o le Fono Tele 2018. O le faamamafa lava a Dr Maliko ina ia maua le lototele o le EFKS e tautala i le gagana o le amiotonu ma le mea moni. Ina ia atagia le Finagalo o Iesu i le molimau a tagata EFKS e siitia ai leo ua le lagona e pei o tagata matitiva ma vaivai o le sosaiete. Ina ia tetele atu i leo malolosi aemaise le Malo ma ana tulafono o faaofi mai e taotaomia ma puapugaina ai tagatanuu.

A'oa'o mai isi Atumotu

O loo faaauauina pea le faiga paaga a le EFKS ma isi Ekalesia Kerisiano mai atumotu o le Pasefika e ala i lana Kolisi Faafaifeau. E toa valu (8) sui mai isi Ekalesia o loo aotauina i Malua i le taimi nei. O Aoao ia Aratibin Mikaere ma Kaititi Tokaia (o faifeau ua fai o laua aiga ae le o mafai ona auai mai le taimi nei) o sui ia e toa 2 mai Kiribati (Kiribati Uniting Church). O loo amata nei i le Tausaga Muamua lo la taumafai. O Aoao o Moeava Mausali ma Peniata Laulau (Tausaga 2) o sui mai le Ekalesia Kelisiano Tuvalu. O Aoao ia Ken Titi ma le faletua ia Temisa, Maka Galuega (single) Tausaga 2, ma Aoao Tausaga 1 o Peoni Lapana ma le faletua ia Sela, ma lafeta Vaopuka (single) e mai le Ekalesia Faapotopotoga Kerisiano Tokelau. O loo manuia lava lenei fesootaiga a le EFKS ma Ekalesia mai le Pasefika ma e foliga mai e umi lava se taimi e faaauau ai lenei fesootaiga lelei.

SQA-Consultation

O le Aso Gafua, 26 Mati 2018 sa toe faatautaia ai le isi faatalanoaga a le SQA ma Faiaoga a le Kolisi e uiga i le faataatiaga o Mataupu Taitasi aemaise ai i ona faatulagaga (Course Outlines) ina ia mulimulita'i ma ausia alafua ma taiala ua faataatitia mai e le SQA mo Aoaoa Faaauau i Samoa nei. O le aotelega lava ia o tutusa ma ausia le maua luga o le atamai o aoaoina ma sini o fia maua mai le faailoga ua tusia. Mo le Kolisi i Malua, e tolu ana polokalame o loo aofia ai. O le *Bachelor of Divinity (BD)*, *Bachelor of Theology (BTh)* ma le *Diploma of Theology (DipTh)*. O le Susuga ia Dr Afereti Uili (FS) o le Konesale (Consultant) lea a le SQA sa ia faatautaia le faamoemoe lenei. O se faamoemoe taua tele mo le Alii Pule ma faiaoga ona ua faateleina le malamalama i le faatinoina o lea itu o le galuega ina ia ausia ai sini ua moomia mai e le SQA. Ae ua faafaigofie ai foi ona faatino le aoaoina o mataupu taitasi e le aufaigaluega i Malua nei.

SQA Workshop

O le vaaiga aoao tetele (vision) a le Samoa Qualifications Authority (SQA); o le taumafai lea e auala atu i le Post School Education and Training (PSET) ni faiga e tatau ma fitaitonu, ausia ma faamalositia le faaleleia atili o le ola susesue o tagata Samoa.

A fua fo'i i ana galuega faatino (mission), e naunau pea le SQA ina ia faaauau ma faatulaga pea i taimi uma le galosoga o le galulue faatasi ai ma le PSET, aua le faamoemoe o le ausia lea i se tulaga maua luga le aoaoina lelei o tagatanuu o Samoa. I le agaga lava lea pe a fua i galuega faatino a le SQA, lea na mafai ai ona faatulaga se fonotaga i le amataga o lenei tausaga ma ana paaga.

I le Aso Lulu ma le Aso Tofi, mai le aso 11-12 o Aperila o lenei tausaga 2018, sa faia ai se fonotaga a le PSET i le fale talimalo o le Taumeasina Island Resort. O le faamoemoe o lea fonotaga ina ia ofaga potopoto sui o aoga faafaifeau, aoga a le malo, aoga tutoatasi ma aoga faapitoa, ina ia faasoa ma faaali manatu i le va fesootai o le PSET ma ofisa poo lotoifale o aoga taitasi. O le agaga ina ia nofo malamalama vaega uma o taua i le faamamafa ma le faamoemoe a le SQA pe a fua i lana vaaiga aoao tetele ma galuega faatino.

O sui faapitoa na tofia e le Pule ia Maafala Limā e fai ma sui o le Kolisi mo lea fonotaga, o Susuga i Faiaoga ia Apela Ah Him (FS) ma Kara Ipinui.

Malo faafetai i Susuga i Faiaoga sa auai i lea fonotaga, aua lava le fefaasoai ma le SQA mo le faaleleia atili o polokalame aoaoga a le Kolisi Faafaifeau i Malua.

CWM COLLOQUIUM

O le Susuga i le Sui Pule ia Alesana Eteuati (FS) ma le Failautusi Aoao ia Vavatau Taufao (FS) sa avea ma sui o le EFKS e toe faaauauina le auai atu i se fonotaga a le FGFL (CWM) mai le tausaga 2017 na mavae nei. O le auga autu o lenei fonotaga o le faatalatalanoaina lea o auala e foia ai faafitauli o feagai ma tagata lotu o atumotu o le Pasefika, e pei o le mativa ma le lē lelei o le faasoaina o tupe ma le tamaoaiga o le atunuu, le faailoga lanu ma le faailoga tagata. Aemaise le oia o le siosiomaga ma le faofoaga ona o suiga ogaoga o le tau i nei aso.

Togalaau Faisua

O se tasi o atinae ua faamaite mai e le Malo o Samoa e ala i le galuega soofaatasi a le Sosaiete a le Au Faifaatoaga ma le Matagaluega o le Soifua Maloloina ua amata faatinoina nei i fanua gauta o le Kolisi i Malua. O le auga ma le sini o lenei taumafaiga ina ia faamalositia tagata lautele e toto ma faaogaina fua o faatoaga e maua ai mea tausami paleni mo le soifua lelei ma maloloina. O lenei faamoemoe, o se togalaau o fualaau fai sua ma fualaau taumafa mata. E amatalia ma faafaeina e le Sosaiete o Faifaatoaga ma le Soifua Maloloina, e ala i le faatoaina o le elele ma toto fatu laau, ma faafaele seia ola lelei ona tuuina lea i le Kolisi e faaauau ma faaleleia atili. E saunia uma mea faigaluega e le Sosaiete i le amataina o lenei faamoemoe ona tuu lima mai ai lea i le Kolisi mo lona faaauauina ma le faaogaina. O se atinae lelei ma aoga mo le Kolisi aemaise o le Aufaigaluega faaolioli o le lumanai, ina ia faamasani iai aua a o atu i nuu ma aulotu e galulue ai, ua iai le poto lautele e unaia ai ituaiga atinae nei, ina ia fesoasoani i le itu tau seleni o tagata lotu ae faamalositia ai le taumafa i meaai paleni mo le soifua maloloina lelei.

Sa faapea ona faia le seminā i le Kolisi e faalauiola ma faamalalamalama atili ai le faamoemoe ma le aoga o lenei atinae.

Ripoti Kolisi

Mafutaga A'oa'o & Faletua



O le viiga lava ma le faafetai e foi i le Atua ina ua mafai ona toe amatalia feau ma galuega a le Kolisi i lenei tausaga. E fai ai la le tagata faatauva'a e fai ma sui o le mafutaga a Aoa'o ma Faletua, e faaleo ai se ripoti pu'upu'u e tusa ma gasologa o feau ma galuega, faapea foi faiga masani a le Kolisi i lenei kuata faalea'oa'oga. E pei ona masani ai, e amata lava le tausaga i galuega masani a le Kolisi. E ui lava foi na matagi-togaina le faigamalaga i le amataga ona o le maliu ai o se tasi o Aoa'o Tausaga Muamua, ae o le mana o le Agaga o le Atua na maua ai le mafanafana ma le lototele e fa'aauau ai tiute ma galuega masani a le Kolisi.

O polokalame masani lava na feagai ma le Kolisi; o faiga-lotu o loo faia lava i po o aso Lua, e faasolo taitai ai le vasega lagolago, ma le aso Faraile e faasolo ifo ai le vasega faaiuso. O le itupā o Faletua o lo'o faatino foi o



latou fuafuaga masani. E matauina lava le galulue fiafia o Aoa'o i taimi o galuega, aua o lo'o fesoasoani foi faamalositino o loo faia i afiafi e faatupulaia ai le malos. Ua faia foi nisi atinae fou mo le Kolisi e ala i le amatalia ai o le faatoaga fualaauina i le pa 2 o le papovi; ua maua ai foi ma isi taleni faaopopo mo Aoa'o. O Faletua o lo'o faia lava latou kolosē ma suisuiga aua lava le faatupulaia o ia tomai tāua ma le aogā.

E faaogaina foi le avanoa e momoli ai le agaga faafetai i le Alii pule ia Ma'afala Limā ma le faletua ia Lalokava, faapea le Sui Pule ia Alesana Eteuati ma le faletua ia Rita ma le mamalu ole aiga faiaoga ma o latou faletua, aua lava le taitaiina o tiute ma galuega a le kolisi i lenei kuata ua faaiuina ma le manuia. E faafetaia ai foi le mafutaga a aoa'o ma faletua 2018, aua foi le galulue ma le onosai i le valaauina ma le ola aotauina. E faapitoa se faafetai i matua ma aiga, nuu faapea ma Ekalesia, i lā outou tatolo ma le lagolagosua ao matou aumau ai i le kolisi. Faafetai i lō outou agalelei ma le alofa o loo faatino e le aunoa.

O mea uma ua tatou faia ua lelei, ia fai lea ma viiga o le Atua.

Faaipoipoiga a le Kolisi



Keresoma & Tuvalu
Seuala



Elekana & Fiailoa
Lealiifano



Fa'alefu & Bellarose
Tumutalie



Tau & Leainati
Toleafoa



Suafa'i & Lea
Soliola

O le faamoemoe ua taunuu o le laau o le soifua lea. O le lagona lea i le Kolisi aemaise lava i aiga ma uo o Susuga i Aoa'o na tuu faatasia ma a latou manamea i le tuuaga umi o le Kerisimasi ma le Tausaga Fou na sei mavae atu nei. O se matātī'a

foi i le numera o faaipoipoga a le Kolisi ona e ono faaipoipoga na faataunuuina ma le manuia. E tasi le Aoa'o Tausaga Tolu ma Aoa'o Faaiuso e toallima na tuu faatasia i le tuuaga. O le Susuga ia Suafai Soliola (Tausaga 3) na faaipoipo atu i le Faletua o Lea i le EFKS Granville Sini Ausetalia. O Keresoma Seuala na faaipoipo atu ia Tuvalu i le EFKS Fairfield Sini Ausetalia. O Tau Toleafoa (Tausaga 4) na faaipoipo atu i le Faletua o Leinatioletuitoga i le EFKS Manurewa Aukilani Niu Sila. O Faalefu Tumutalie (Tausaga 4) na faaipoipo atu ia Bellarose i le EFKS Falefa. O Elekana Lealiifano (Tausaga 4) na faaipoipo atu ia Fiailoa i le EFKS Fausaga. Ma Oli Levi (Tausaga 4) na faaipoipo atu ia Peti i le Ekalesia Metotisi Sapo'e. Ia faamanuia tele le Atua i aiga fou ua tuu faatasia.



Aoga Aso Sa & Polokalame Eseta

Salamo 127:3 "Faauta o le fanau o le tofi lea mai le Alii, o e ua fanau mai, o le tau'i lea mai ia te Ia",



O le viiga ma le faafetai e le faaitiitia lea i le Atua, ona o le avanoa ua mafai ai ona galulue faatasi ma le Paia i le Aiga Faiaoga aso Sa, aua le fanau i lenei afa muamua o le tausaga. Sa amata le Aoga Aso Sa i le aso Sa lona lua talu ona amata le Kolisi, aso Sa 11 Fepuari, 2018. Peitai o le malosi o le

ma'ema'e o le afā o Gita, na toe tolopōina ai, ona o le faaletonu o le eletise ma le suavai. Na amata lelei ma sologa manuia le aoga aso Sa, e le gata o aoga a Faiaoga i aso Toonai, faapea foi aso Sa taitasi. E lelei foi ona tapena Faiaoga i mataupu o Vasega uma e lima, mai le Vasega Amata, e oo lava i le Vasega Faapitoa. O le aso 27 o Mati sa faia ai le Polokalame faapitoa mo le Eseta. Sa faatinoina ai e Faiaoga aso Sa ma le Vasega Faaiuso le tala o le Aso Maliu, e toe faamanatu ma toe fafagu le Togiola na saunia e lo tatou Alii o Iesu Keriso le Uo a le fanau. O le aso 19 o Aperila, na faia ai se sailiga tupe (*Fundraising*) a le Aoga Aso Sa mo le taimi muamua. O lea faamoemoe, sa faatinoina o le *Movie Night*, e totogi le ulufale o tagata uma e maimoa, sa faatauina ai foi taumafa na tapenaina e Vasega taitasi, o se faamoemoe sa lagolagoina e le nuu atoa, e le gata i le Aiga Faiaoga, ae faapea foi Aoao ma Faletua. Na iu ma le manuia ia faamoemoega lelei uma, faafetai tele le lagolago. Faamoemoe pea i le Atua o le a manuia ai galuega a le Aoga Aso Sa, i le agai atu i Kuata o totoe.

Faafetai
Sunita Nua Leaso (Failautusi).



Taaloga A'oa'o & Faletua



O ta'aloga o se tasi lava o itu tāua o le ola a'otauina i le Kolisi ma o se polokalame o lo'o faauau pea mai lea tausaga i lea tausaga. O le itupa o Aoao, o loo faapea ona faatinoina ai taaloga o le kirikiti, soka ma le lakapi pa'i. O le Kuata Muamua sa amatatia ta'aloga i tuā fale o le Kolisi e ala i le fa'aga-tama o le kirikiti. Faatoa suia lava taaloga o se Aso Tofi pe a lē lelei le tau. O lenei tausaga o loo mulimuli lava i vaeveaga sa iai au kirikiti mai le tausaga ua tuanai, Lanu Meamata, Samasama, Moana, ma le Mūmū. O le amataga o lenei tausaga sa umia e le Au Lanu Meamata le siamupini mai le tausaga ua mavae atu 2017; peita'i o lenei tausaga ua se'e atu le manumalo i le Au Samasama ina ua mavae lenei kuata manumalo i lenei ta'aloga. O se fiafiaga tele i le ta'ita'i-komiti ma le komiti o taaloga le alualu pea i luma o le fiafia o Aoao i lenei ta'aloga o le kirikiti. E le'i tele se taimi, sa ta'aalo ai Aoao i le malae i lumā-fale e ala i le soka ma le lakapi pa'i. E pei lava ona iai mai tausaga e tele, e lua lava au e vaeveaina ai Aoao i taaloga o le soka ma le lakapi pa'i, Paepae (*White*) ma le Uliuli (*Black*). O ta'aloga la sa mafai ona fa'atinoina ua tulai mai ai o loo sili manumalo o le Pa'epa'e. O loo maua pea le faamoemoe o lenei polokalame a le Kolisi ina ia lē gata ia maua le fiafia o Aoao ma Faletua i taaloga, ae maua ai foi le soifua maloloina. Aua o upu lava o le pese a le Kolisi, o aoga lava mea uma. Manuia le Fonotele. Ma le fa'aaloalo tele fa'afetai.



Maluapapa Pre-School

KUATA MUAMUA:

I le ava tele e tuuina atu ai se ripoti o lenei kuata aoga o le tausaga 2018 a le Malua Kindergarten .

O le Malua Kindergarten e i lalo o le faauluuluga a le Faletua o le Alii Pule, Lalokava Limā, faatasi ai ma le lagolago a Faletua o Faiaoga ia Mile Nofoaiga ma Amelia Setefano. O le aoga i lenei tausaga na amata i le aso 19 o Fepuari. O itula aoga o le 8.30am - 11am, mai le Aso Gafua i le Aso Faraile. E sefulu valu tamaiti aoga. E toavalu tama ae toasefulu teine. O loo aoga ai foi nai fanau, e lua ma le afa tausaga le matutua, o ē ua mafai ona faamalieina aiaiga e alagatai ai ona auai i le Kindergarten. O tamaiti auai o le Aoga Amata, o alo lava o Aoa ma Faletua Malua

E toa sefulu tolu Faletua o Aoa, tofia e le Faletua o le Pule e galulue i le Kindergarten mo lenei kuata. O Faletua mai tausaga taitasi e faatinoina galuega ma aoga o alo ma fanau i aso taitasi, i lalo lava o le taitaiga a Faletua o Faiaoga.

Aoga & Polokalame (Curriculum & Programme Planning)

O aoga ma polokalame fai o lenei Kuata sa mulimuli tai i le taiala o loo faaogaina e Aoga Amata i Samoa nei. E faia folasaga (presentations) a Faletua o Aoa i vaiaso taitasi mo polokalame faa-aoga mo aso taitasi mo tamaiti, i lalo o le vaai-ga a Faletua o Faiaoga ia Mile Nofoaiga ma Amelia Setefano.

E iai avanoa i aso taitasi e tapena ai le fanau mo Primary School. Faataitaiga: O le aoga ina lea o le tusiaina o mataitusi ma o latou igoa e faaoga ai le Pi Faitau, ma le Alphabet faa-peretania. Sa faapea foi i le matematika 1-20, siepi, o lanu o le nuanua, o vaega o le tino, galuega eseese, o le aiga, o lau aoga ma le totoina o le togalaau (gardening). O le faamoemoe lava ina ia maua se iloa amata o tamaiti i soo se vaega talafeagai ma o latou tausaga, a o lei ulufale atu i Primary School.

O le masina o Mati sa asiasi mai ai nisi o le Matagaluega o Aoga i lalo o le faamalu o Aoga Amata pei ona masani ai,. Sa faamalieina vaega uma o lea asiasiga e tusa ai ma alafua ua uma ona faataoto mai le Ofisa o Aoga.

Sa faia se polokalame faapitoa o le vaitau o le Laupama, sa faatinoina ai e fanau ia tala ma ni pese faevagelia e faatatau i le aso maliu. Sa faaiuina i nisi o galuega faatino e pei o le 'easter egg hunt.'

O le Aso Faraile 20 Aperila na tuua ai le Malua Kindergarten mo lenei Kuata.

Faafetai,
Leaola Leilua.



Literacy & Reading



E muamua ona si'i le viiga ma le fa'afetai i le Atua ua mae'a le matou polokalame mo lenei Kuata. O le fa'amoemoe lava o lenei polokalame, o le fesoasoani, ma fa'aleleia atili le faitau o alo ma fanau, i le gagana Peretania, e pei ona a'oa'oina i aoga eseese ma Kolisi Mauualuluga. Na amata le polokalame i lenei tausaga i le aso 19/02/18. E to'a fa sefulu ma le lima (45) tamaiti mo vaituuaga muamua. E to'a valu (8) tamaiti fou ua atoa le ta'i lima tausaga, ma le to'a sefulu fitu (17) tamaiti fou o fanau o Aoa ma Faletua o le Tausaga Muamua. O le taimi nei o lo'o matou tau sailia ni fesoasoani (donations) mo ni tusi fou auā lenei polokalame, fa'apea ni fesoasoani e toe fa'atelēina ai le faletusi mo tamaiti. E fa'amoemoe ma tatalo pea i le Atua mo meatotino mo le fanau, e ala i ni tusi fou fa'apea ma fatatusi. E fa'afetaia ai pea le Alii Pule o le Kolisi, ma le Faletua, fa'apea Faletua o Faiaoga, fa'apea matua o fanau uma, ona o le lagolagosua i lenei polokalame mo le lumana'i manuia o a tatou fanau. E fa'afetaia foi Faletua o Aoa o lo'o latou fesoasoani tele i le fa'amaopoopoina o lenei polokalame. Ia manuia le Fono Tele mo lenei tausaga.

Lemau Pala'amo, Amelia Setefano

Library

Muamua lava ona faafoi pea le viiga, le faamanu ma le faafetai tele i le Atua Paia, ina ua aulia mai lenei vaitau taua i le Ekalesia, e ala i lana Fono Tele 2018.

Ao lenei avanoa taua ua maua, e tuuina atu ai sina ripoti puupuu i galuega ma auunaga a le Faletusi a Malua talu ona amatalia lenei tausaga.

I tulaga tau i tusi ma tusitusiga e faasino i suesuega tau i le Tusi Paia, o loo faatuputupulaia pea le faaopoopoina o tusi fou e ala i faatauga tusi mai atunuu i mamao mai Matagaluega taitasi a le Kolisi. E le gata i lea, o loo faapena ona faaopoopo pea tusitusiga faauila (electronic books) mo tapenaga ma suesuega a Faiaoga, Aoao ma Faletua.

I le masina o Novema i le tausaga 2017, na faailoa aloaia mai e le Susuga i le Pule ia Maafala Limā, se tasi o auunaga tau i suesuega i luga o le upega tafailagi (online research database), aua lava sailiiliga tau i le Tusi Paia mo le Kolisi. O lea auunaga faasuesue i luga o le upega tafailagi, ua ta'ua lea o le GlobalTheoLib. E maua lea i le tuatusi o le upega tafailagi o le – www.globethics.net. I le taimi nei, e tusa ma le 2 miliona ma ona tupu tusitusiga tau i le mataupu silisili (theology) ma galuega tau i Ekalesia Soofaatasi (*ecumenism*) e mafai e paaga poo Kolisi Faafaifeau a le *South Pacific Association of Theological Schools (SPATS)* ona faaoga fua e ala ma se totogiina.

I le masina o Mati o lenei tausaga, sa faapena ona faaolaina ma faatumauiina ai le fesootaiga (link) e ala i le *catalog system* a le faletusi. Ua mafai nei e Faiaoga, Aoao ma Faletua ona faaoga fua lea auunaga i luga o le upega tafailagi mo suesuega ma tapenaga i mataupu silisili ma galuega tau i Ekalesia Soofaatasi.

E toe faailoa atu ai ma le agaga faafetai tele i le Tamā Penisione ia Kerisiano Soti, e tusa ma lana foai e ala i faaputuga

GlobeTheoLib | a project of Globethics.net and World Council of Churches

Library | Network | Research

Home | News | About | Contact | Help | Donate


Global Digital Library on Theology and Ecumenism

2,000,000

Fulltext documents

The Global Digital Library on Theology and Ecumenism (GlobeTheoLib) is a multilingual online library offering access free of charge to full-text articles, journals, books and other resources on theology, intercultural and interreligious dialogue, ethics, and ecumenism in World Christianity. Participants also have the possibility to contribute their own documents to the library.

Register now for free



Free access to more than 2,000,000 theology documents

tusi ua tele naua ua faaopoopoina i le faalelei atili o le faletusi a le Kolisi. Malo faafetai le lagolagosua mai i le auunaga a le tatou faletusi nei.

O se tala puupuu lea mo le silafia e le mamalu o le 'Au Usu Fono o lenei tausaga 2018 ae ā le tapuaiga a le Ekalesia Aoao.

Ma le faaaloalo tele,
A. Fasavalu

Pa Povi



O le vaega lenei o lo'o nafa ma le tausia o manu papalagi a la tatou Kolisi. E to'afitu i matou o loo galulue ai, tofia mai lava i vasega taitasi aua tiute masani o lo'o faagasolo i tausaga ta'itasi. O loo sologa lelei lava galuega faatino a lenei vaega, ma ua faaopopo foi le aofai o manu mai le tausaga na sei mavae atu nei. E 18 manu sa iai i le faaiuga ole tausaga 2017 ae ina ua mae'a ai o le kuata muamua o lenei tausaga ua 22 manu o lo'o iai nei. Ua aveeseina foi se tasi o pa sa faaogaina e lenei vaega mo le atina'e o manu, ae ua fa'aogaina e totō ai fualaau'aina, o se atina'e o lo'o tau amata i le taimi nei. Ona totoe ai lea o o fanua po'o pa e 7 o lo'o tausia ai tatou manu. O lo'o sologa lelei pea galuega a lenei vaega aua le atina'e o manu papalagi i lenei tausaga.

Maumaga



Faafetai i le Atua i Lona Alofa ma Lona Agalelei, ua maua ai pea e i tatou le soifua manuia. O se ripoti lenei a le Komiti o Maumaga mo lenei foi vaituuaga ua maea atu. O le mea moni o le taimi nei, o lo'o sologa manuia pea maumaga a le Kolisi. Ua tele le meaai, e le gata i talo, a ua faapea foi ona lelei taamu, e tua iai le Kolisi mo ana taumafa i le taimi nei. O le Aso 24 o Mati na faataunuu ai le asiasiga muamua o lenei tausaga, ma o le tusaga sa iai e tai 1500 tiapula a le maumaga. Na faafiafiaina le Komiti i le tali mai o maumaga taitasi e tusa ai o le asiasiga, aua o maumaga uma e le gata na ausia uma le tusaga na faatatauina ae na tofu uma foi ma le faasiliga. O le fuafuaga a le Susuga i le Taitai faapea Susuga i Faiaoga o lenei Komiti, o le Aso 7 o Iulai, o le a faataunuuina ai le Talomua o lenei tausaga. O le taimi nei, ua tatalaina maumaga mo le faaogaina mai mo fuafuaga a auaiaga aemaise le Kolisi. Ua matauina lava le tele o le meaai ua maua, ona ua tuai le faaoga, ae ua vave ona pala toaga. O le mea sili o lo'o tele lava le tamaoaiga o faatoaga e tua iai le Kolisi mo ana taumafa. O se ripoti lea o maumaga o lona vaituuaga ua mavae atu. Ma le faaaloalo lava.

Komiti o Maumaga, 2018.

Tautai A'e



O le viiga ma le faafetai i le Atua na siitia ae i le Aso Lulu, 23 o Me, 2018 ina ua aloaia ai le malolo mai ai o nisi o Tamā ma Tinā o le Ekalesia mai le galuega faafaifeau sa taupati ai i le tele o tausaga. O Toa o le Talalelei na faalele e Aiga, Nuu ma Ekalesia aua le Atua ma Lona Finagalo. O leni Sauniga Lotu faafetai



Liki FT & Eseta Tiatia
Sui o le Komiti Malua



Menu FS & Fililia Puni



Faatauolua FT & Susan Mauala

ua aloaia ai le penisione malolo o i latou nei: Liki (FT) ma Eseta Tiatia o le Matagaluega Amerika, Menu (FS) ma Filia Puni mai le Matagaluega Niu Sila i Saute, Faatauolua (FT) ma Susana Mauala mai le Matagaluega Apia i Sasae, Setu (FT) ma Leatuvai Samitioata mai le Matagaluega Apia i Sasae, Fuifui (FS) ma Roberta Teevale mai le Matagaluega Apia, Elekosi (FS) ma Lila Viliamu mai le Matagaluega Faleata, Falemalu (FS) ma Fetalai Aiavao mai le Matagaluega Falealili-Safata-Siumu, ma Gutu (FS) ma Mesepa Faasau mai le Matagaluega a Itu o Tane.

E fia faapitoa se faamatalaga i le Susuga i le Toeaina ia Liki Tiatia o se tasi o Sui aupito i leva o le Komiti o Malua. Sa avea ma Faiaoga ma o'o ai lava i le tofiga Sui Pule o le Kolisi ae le i see atu e galue i le galuega Faafaifeau tausinu. O le a misia foi lona sao taua i le faatautaiga o galuega aemaise le atinaega o lana Kolisi Faafaifeau e ala i le Komiti o Malua. O lea e lagona ai lava le agaga faafetai mo leni auauna a le Atua ma ona sao taua sa tautua ai i le Kolisi.

E faapea foi ia i latou uma ua mapu ane mai le galuega faafaifeau tausinu i leni tausaga. Aemaise le tele o outou sao sa lagolago ai i le Kolisi Faafaifeau i soo se itu. Malo le tauata'i. Malo le tautua i le Atua ma Lona Finagalo. Tautai A'e. Ua outou tau lava le taua lelei ma ua outou manumalo ai. Leni ua faaecaina outou e le Atua. Mapu ane loa ma le fiafia ma ia manuia tele le feagai ai ma faiga malologa.



Elekosi FS & Lila Viliamu



Fuifui FS & Roberta Teevale

Faamuli o le Eseta—Tausaga Muamua

O le faamoemoe o le faamuli leni a le tausaga muamua ina ia faamasani i tiute fai i totonu o le Kolisi aemaise le faatinoina o tiute faafaamuli.

O le isi faamoemoe taua ina ia mafai ai ona lelei fesootaiga a Aoa ma Faletua o le tausaga muamua aua le sologa lelei o le faatinoina o o latou tiute fai.

O leni faamuli sa taitaiina lava e le Susuga i le Tama Pule ma le Faletua ae lagolagosua iai le Susuga i le Faiaoga ia Filemoni Crawley ma lona faletua o Alofa. O le aso 28 o Mati i le aoauli na tuua ai le aoga mo le Eseta ma o le afiafi foi lava lea ina ua uma faigalota afiafi na faailoa mai ai e le taitai faamuli tiute fai ma matafaioi o le a feagai ma la matou vasega. Na tapena ai foi pese ina ua maea meaai o le afiafi mo le lotu i le taeao o le Aso Faraile o le Aso Maliu. Sa tofia ai foi ni aoao se toalua e fesoasoani i le Tama Pule i le faatinoina o lea sauniga lotu. O le aoauli na malolo lelei ai ma faatau le aso Maliu. O le mea laualuga lava i le faamuli o le mama o le lotoa, fafagaina o puua i afiafi taitasi aemaise ai le leoleoga i po aua le saogalemu o mea totino ao feagai ai le Kolisi ma lana tuuaga o le Eseta.

O le Aso Toonai sa fai ai galuega ona sosoo ai lea ma le tapenaina o le umu mo le Aso Sa. Sa tofia foi aoao e toatolu e fesoasoani i le Tama Pule i le sauniga o le Aso Sa. O le Aso Gafua sa fai ai taaloga ma le papakiu e faauma ai le faamuli aua e toe foi mai ai le tuuaga o le Eseta. O le aofai o leni vasega e toa 28, e toa 11 Aoa e lei faia ni taitoalua, ma le toa 17 e fai taitoalua, ao le aofai o faletua e 15 ona e iai nai aoao e toalua mai Kiripati e le o mafai ona auai mai o la faletua. E toa 2 aoao mai Toelau o loo iai i leni vasega.

O leni faamuli sa matuai aoga lava i la matou vasega. Ua mafai ai ona malamalama le tasi i le tasi. Ua mafai ai foi ona fefaasoai lagona ina ua lelei le sootaga. O le faafetai e sii lava i le Atua ona o lona faatasi mai na mafai ai ona faataunuina leni faamoemoe.

E le mafai foi ona faagaloina le lagolagosua ma le fautua mai o le taitai faamuli i tulaga e faaletonu ma sese ai se tasi. O le faamuli foi lea ua mafai ai ona malamalama atili i nisi mea taua i totonu o le laumua aemaise ai foi o taiala e lima taitaina ai le ola aotauina. O le manatu, ua lava taoso leni vasega i le faatinoina o tiute faafaamuli o fufou mai i leni tausaga.

Study Center



Viia pea le Alofa Tausi o le Atua i alo ma fanau a Malua. O lenei foi tausaga ua ofi mai ai nisi o fanau i la tatou Malua Study Centre (MSC) faapea ai foi nisi o Aoao ma Faletua e fesoasoani i le taumafai o fanau. Ua tusa nei ma le 45 le aofai o alo ma fanau ua i le MSC i lenei tausaga. O alo lava ma fanau a Faiaoga Malua, Aoao ma nisi o fanau a faiaoga Leulumoega Fou o loo nonofo ai i le Aoga.

O le faamamafa lava a le MSC o loo tumau pea, ia maua e fanau se avanoa ma se siosiomaga lelei mo a latou suesuega. Ia le gata ia ausia ai e le tamaititi lona mafai e gata ai i aoga ae ia faatupu ai pea le fiafia e suesue i a latou meaaoga.

Ae fia faaalua lava i lenei lomiga le agaga faafetai ma le faamalo i sui o le MSC o le 2017 i taunuuga o le taumafai na iai i lenei tausaga:

Suega ulufale i Samoa College na su'e ai tamaiti Year 8: Na pasi uma e na su'e o le MSC (100% pass rate)

Pasi uma i latou na sue School Certificate (SC) ma le Secondary School Leaving Certificate (SSLC) (100% pass rate)

Foundation Year students:

Aunua Uele: University of Waikato (scholarship – Feb.2018)

Fiso Maulolo: University of Auckland (BA – first year Feb.2018)

Karanita Petaia: Minzu University of China (scholarship - Sept.2018)

Mase Neemia: University of Auckland (BCom – first year Feb.2018)

Rayleen Simati: Beijing Language and Culture University (scholarship - Sept.2018)

E momoli ai foi moomooga alofa o le MSC i le Susuga i le Faifeau ia Panama ma le Faletua ia Herema ma o la alo i le galuega ua sauni atu ai i Seattle USA. O nisi sa lagolago malosi i lenei faamoemoe ao iai i Malua nei. O lea foi sa faafiafia ai le MSC e ala i le sāsā ma le pese i le po na faamavae atu ai mo lenei aiga. Faafetai i le Faletua ia Emelia Sisigafu'a, le Aoao ia Aunese Anau ma le Faletua ia Fiona mo le tapenaina o lenei faamoemoe o le fanau.

Ae faateleina pea le agaga faafetai i lo matou taitai, Le Tama Pule ma le Faletua i le faamallosiau ma le taitaiga ua gasolo manuia ai lava galuega a le MSC. Faafetai foi mo i latou uma na faaavanoaina pea le taimi e fesoasoani ai i meaaoga a nai fanau i lenei foi kuata ua maea atu. Faamanuia pea le Atua i alo ma fanau a Malua. Malo le faamalolosi. Tatou toe feiloai foi i le Kuata Lua.

Malua Journal

O le lomiga o lenei tausaga 2018 o loo tuu faatasia ai pepa na fofogaina e Faiaoga o le Kolisi i le Mafutaga Faafouina a Fai-feau ma Aoao Tausinu i le masina o Aokuso 2017. O tusiga o loo i lenei lomiga e aofia ai mataupu tau le Tusi Paia i le Feagaiga Tuai ma le Feagaiga Fou, o le Mataupu Silisili, Talafaasolopito o le Ekalesia Kerisiano, ma le Faiva Alofilima o le Mataupu Silisili. O nei tusiga o loo tusia i le gagana Samoa vagana nai pepa laiti na saunia e le Auaigaluega Faiaoga mo fonotaga sa faia i atunuu i fao o loo i le gagana Peretania. O le faamoemoe lava ia aoga lenei sao o le Auaigaluega Faiaoga i Malua i le soifua sailiili faaleagaga o tagata o le Ekalesia. Ina ia le gata e faalateleina le malamalama i Afioga a le Atua ae ia faatino lea silafia i le ola faakerisiano i aso faisoo.

O nisi o mataupu o i lenei lomiga e aofia ai:

“Let us descend and disurbanise the people” Reading the Babel narrative (Genesis 11:1-9) in light of Apia’s urban problem

Dr Arthur Wulf (FS)

A’oa’oga a Paulo i le soifua foa’i mo le Atua (2 Korinito 9:1-15)

Dr Vaitusi Nofoa’iga (FS)

O se Mataupu Silisili mo le tagata ua gasegase le mafaufau (A Theology for the Mentally Ill person)

Dr Imoa Setefano (FS)

500 tausaga o le toe fuata’ina (1517-2017) Matini Luteru (1483-1546) Ua na’o le Tusi Paia lava (The Bible Alone)

Dr Aukilani Tuiai (FS)

Fa’alogo i le Agaga o le Atua: O le galuega fa’amisionare a faife’au ma faletua LMS Samoa i le Pasefika 1839-1979

Dr Latu Latai (FS)

O Iesu o le Fautua Lelei Jesus the Wonderful Counsellor

Dr Alesana Pala’amo (FS)

O le tala fa’asolopito o le fa’aaogaina o ata ma fa’atua i totonu o tapuaiga Kerisiano

Panama Pouono (FS)

E poupu e le alofa le faia ma tagata e i ai to’atuga tumau o le tino (people with physical disabilities)

Filemoni Crawley



Faailoga o le Nofoga na Fafagaina ai le Motu o Tagata



Nofoga na pau ai le Alii a'o amo Iona Satauro agai atu i Korokota



Malumalu i Ketesemane o loo iai i totonu le nofoaga na afutoto ai le Alii



Nofoga na Faasatauro ai Iesu i Korokota



Olive i Ketesemane



Nofoga tonu na Afutoto ai le Alii i Ketesemane



Vaega o le Vai o Ioritana na Papatiso ai Iesu e Ioane le Papatiso



Vaaiga Eseese i le Kolisi



Taga Polo




E lua ta'aloga tapolo sa faia i lenei tausaga. O le Aso Faraile 11Me2018 sa tapena ai le kolisi mo lo latou ta'aloga ma le au tapolo mai Ausetalia. Peitai ane, sa lē mafai ona auai atu o le toatele o le au tapolo mai Ausetalia, ona o tuatuagia le ma'alofia. O lea sa faia ai loa e Kapeteni o au e lua o le fa'aiuga, ina ia manumalo le au a Malua (by forfeit) ae toe fetu'una'i au ina ia faia pea se ta'aloga. Ona galulue lea o komiti i le vaevaeina o le au ta'aalo i ni au se lua: Mareko ma Luka ma fa'agasolo ai taaloga mo lena aso. O le i'uga o le ta'aloga muamua: **Luka 605, Mareko 622.**

O le ta'aloga lona lua sa faia ma le au a Niu Sila (Matagaluega Aukilani ma Manukau) i le Aso Faraile 18Me2018. O se ta'aloga matagofie ona o le tele o au, ma le finauina i le vā o au taitasi.

O le i'uga o lea ta'aloga lona lua: **Niu Sila 664, Malua 717.** O le aotelega o ta'aloga tapolo mo lenei tausaga: o le au a Niu Sila, tasi le malo; o le au a Malua, tasi le malo, tasi le faiaina; o le au a Ausetalia, e leai se malo, lua faiaina.

E fa'afetaia ai fo'i le lagolago malosi e le Sinaupualofa Foundation Trust ma Kaisara Real Estate ona o fesoasoani sa foai mo ta'aloga tapolo mo lenei tausaga. E faapito se faafetai i le susuga ia Fata Ueligitone Malifa ma le Vuksich & Borich Civil Engineering Company mo le saunia lelei o le toniga a Malua. Fa'apena se fa'afetai i le susuga ia Rev. Dr Peletisala Limā mo le saunia o leisi foi toniga a Malua mo ta'aloga tapolo mo lenei tausaga. Ia alofagia e le Atua i latou uma sa agalelei mai mo lenei fa'amoemoe. Fa'amanuia tele le Atua. O le auga lava o nei ta'aloga e pei ona masani mai ai i tausaga taitasi, e lē o le manumalo, a o le ta'aalo fiafia ma le tusa'afia, ina ia mafuta ma fealofani ai le aufaigaluega a le Atua. Ia manuia tele le usugāfono mo lenei tausaga.



MALUA GOLF

The Malua Golf Team uniform is generously donated annually by;

**VUKSICH & BORICH
CIVIL ENGINEERING
COMPANY**

Other sponsors:

REV. DR. PELETISALA
LIMĀ
SINAUPUALOFA
FOUNDATION TRUST
KAISARA REAL ESTATE



Komiti o le Maluapapa

Makesi Neemia, Alesana Pala'amo, Apineru Fasavalu,
Sega Asafo & Peniamina Toailoa
Malua Theological College
www.malua.edu.ws

© 2018